

per *quasi-inspirationem*, juxta regulas generales quas concilium Lateranense pro omnibus electionibus solemnibus præcripsit, cap. *Quia propter*, 42, DE ELECTIONE, lib. I Decret. Quando adhibetur *scrutinium*, tres assumuntur e collegio qui secrete et sigillatim vota singulorum diligenter exquirant scriptis redacta, et mox publicent in communi, quod repetitur donec concurrant in eundem suffragia duarum partium<sup>1</sup>. Si per *compromissum* velint procedere, necesse est ut omnes uni, aut quibusdam, concedant officium eligendi, spondendo se ratihabituros electionem sic celebratam. Tandem electio fit per *quasi-inspirationem*, si, nulla *prævia* habita deliberatione, omnes simul consentiant: talem unanimitatem a Deo inspiratam merito præsumunt.

5º Cæterum, quavis ratione procedant, necesse est quasdam servari conditiones: 1º ut omnes Cardinales qui jure communi habent facultatem suffragandi, ad conclave admittantur quocunque tempore civitatem advenerint, electione nondum consummata; 2º ut electores libertate fruantur in ferendis suffragiis. Si per metum gravem addicantur, vel errore substantiali decipientur, non valet electio, uti generatim statuit cap. *Cum dictus*, 32, et cap. *Quisquis*, 43, DE ELECTIONE. Hæc libertas supponit electores posse, pro suo nutu et dictamine conscientiæ, eligere quem voluerint<sup>2</sup>: unde vel unius exclusio jus lœdit, et eo gravior injuria sit Ecclesiæ, quò persona exclusa præ cæteris reputatur magis idonea regimini. Nihilominus tamen, cum

<sup>1</sup> *Publicato* scrutinio si due partes suffragiorum in eundem non consenserint, cardinales qui sua vota non dederunt candidato, possunt uni ex nominatis accedere, per schedulas etiam secretas, ut perficiatur numerus necessarius votorum ad consummationem electionis, juxta formam prescriptam a Gregorio XV constitutione *Eterni Patris Filius*, an. 1621. Id vocatur *accessus*.

<sup>2</sup> Ea quæ jam pluribus abhinc saeculis quidam principes (imperatores Germaniæ, reges Galliæ et Hispaniarum) pretulerunt, ne quis sibi non gratius eligeretur in Pontificem, Ecclesia numquam sua auctoritate sancivit, licet, ob bonum pacis, Cardinales consueverint rationem habere *exclusionis* in electione.

relinquatur, etiam hac exclusione facta, ampla facultas assu-mendi dignum, probabile non est ita lœdi libertatem ut in discrimen veniat validitas electionis. 3º Ut electione libere celebrata, res acta sit respectu electorum, adeo ut jam non valeant variare in suis suffragiis: cap. *Publicato*, 58, eod. tit. Penes autem electum est non consentire electioni; quod si præstiterit assensum, eo ipso Pontifex jure divino constituitur.

4º Cardinalis primus ex ordine Diaconorum peractam electionem solemniter populo significat his terminis: *Annuntio vobis gaudium magnum; habemus Papam, Eminentissimum et Reverendissimum Dominum N... qui sibi nomen elegit, ut N... in posterum vocetur.*

## ARTICULUS II. — DE JURISDICTIONE S. PONTIFICIS.

\* 75. — Prærogativas et jura Romani Pontificis et Primatu Apostolico deducimus, qualis definitur a concilio Florentino cuius verba supra retulimus (nº 71), et probatur in tractatu de *Ecclesia*. Constitutus est scilicet, in persona Petri principis Apostolorum, doctor et pastor omnium fidelium, centrum unitatis catholiceæ, in quo omnes ecclesiæ particulares convenire debent. In eo consistit summa jurisdicçio quæ est potestas docendi, disponendi bona spiritualia, et regendi societatem christianam, in ordine ad cultum Dei et animarum salutem. Postquam haec jura explicata fuerint, pauca subjiciemus de litteris pontificiis, quibus S. Pontifex suas voluntates indicit, et de earumdem litterarum promulgatione.

\* 76. — Iº Quæ corollaria deducantur ex titulo doctoris Ecclesiæ catholicæ?

Ex titulo doctoris sequitur 1º jus condendi decreta seu definitions dogmaticas, circa fidem et mores, quæ ad omnes et

singulas ecclesias dirigantur, scilicet ad universam Ecclesiam; nam divina institutio gregem universum Petro commisit. Jus illud, extra casum concilii oecumenici, soli S. Pontifici competit; quia nullus est praeter illum qui individue acceperit a Christo curam pascendi omnem gregem, agnos et oves... Suo in ea parte officio fungi potest, sive primus docendo fideles, sive suo assensu firmando doctrinam ab aliis pastoribus traditam; et si opportunum arbitretur, causas exortas ad suam sedem evocat, sublata cæteris omnibus facultate de illis cognoscendi. « En des cas extraordinaires, ait Bossuet, dans des matières fort débattues et où il serait à craindre que l'évêque pat se divisât, le Pape peut s'en réserver la connaissance, et le Saint-Siège a usé avec beaucoup de raison de cette réserve dans les matières de la grâce. » (*Lettres diverses*: Lettre xciv<sup>e</sup> à M. Dirois, t. XXXVII, éd. de Versailles.)

Sequitur 2<sup>o</sup> constitutiones dogmaticas a Sancta Sede datas omnibus imponere obligationem definitionibus fidei adhærendi, sublata quibuslibet, etiam Episcopis, facultate aliter judicandi. Re quidem vera, oves debent sequi pastorem; qui indigent corroborari in fide, audire debent vocem illius cui Christus Dominus commisit curam confirmandi omnes; igitur, cum successor Petri sit omnium pastor, et suos fratres confirmandi officium suscepit, necesse est ut omnes adhærent definitionibus dogmaticis Sedis Apostolicæ. — Probatur insuper celebri professione fidei, quæ attribuitur S. Hormisdæ, et cui tot Episcopi per multa saecula subscripserunt, ut « certum sit, ait Bossuet, hanc formulam in tota Ecclesia catholica fuisse comprobatam. (*Defens. Declar. cleri Gall.*, lib. X, c. vii.) Porro, haec habet illa professio: « Prima salus est rectæ fidei regulam servare; quia non potest prætermitti sententia D. N. J. C. dicens: Tu es Petrus... Haec quæ dicta sunt rerum probantur effectibus; quia in Sede Apostolica inviolabilis semper catholica custoditur religio: unde sequentes in omnibus Apostolicam Sedem, et prædicantes omnia ejus constituta,

« spero ut in una vobiscum communione quam Sancta Sedes prædicat, esse merear, in qua est integra et verax religio nis christiana soliditas<sup>1</sup>. » Ponderentur verba SEQUENTES IN OMNIBUS: his inculcatur certe necessitas adhærendi, non solum articulis quos per multum ac diuturnum tempus Sancta Sedes constanter prædicavit, sed et recenti definitioni quam proponit; talis quippe necessitas omnia tempora complectitur, ad omnes constitutiones extenditur. — Id confirmat forma solemnis constitutionum dogmaticarum S. Sedis quibus declaratur quoscumque judices debere quæstiones subortas definire juxta sententiam prolatam ab Ecclesia Romana, « sublata eis et cuilibet eorum facultate quavis aliter judicandi et interpretandi. » Judicium externum quod Ecclesia pronuntiat circa quæstiones fidei, determinat assensum internum fidelium; ergo si cuncti, cum fideles, tum pastores, debeat non aliter judicare quam fert constitutio pontificia, sequitur omnes æque teneri ad illi adhærendum.

Hec necessitas obsequendi definitionibus dogmaticis Sancte Sedis, gravissimum argumentum est infallibilitatis SS. Pontificum. Quamvis, attenta sola natura rerum, auctoritas superioris docentis inducere valeat ex parte subditorum obligationem obsequendi assensu interno reverentiali, præcisa hujuscem superioris infallibilitate, ut servetur debita subordinatio, ut infra dicemus, ubi de episcopis (nº 167), aliter ratiocinandum est quando agitur de summo Pontifice docente Ecclesiam universalem. Divina enim providentia permittere non potest ut expouatur Ecclesia periculo errandi in causa fidei, dum supremo suo pastori debitum obsequium præstat. Quapropter, cum omnes qui sunt undique fideles, teneantur adhaerere definitionibus Sanctæ Sedis, easdem constitutiones habere necesse est pro iudicio certo, irreformabili, et infallibili doctrinæ christiane.

<sup>1</sup> Labbe, tom. IV, col. 1444, 1486, 1686.

Sequitur 3º S. Pontificem jus habere damnandi libros qui pravam doctrinam continent, et illorum lectionem prohibendi. Qui invigilare ex officio debet fidei integritati, et fideles passare sana doctrina, is procul dubio poterit, imo debebit ea removere et tollere quæ plurimum nocent fidei, quales sunt libri hæretici. De his iterum dicendi occasio se dabit, ubi ad Congregationem *Indicis* devenerimus.

\*77. — IIº *Quænam corollaria deducantur ex titulo pastoris Ecclesiæ catholicæ?*

Ex titulo pastoris sequitur 4º S. Pontificem habere jurisdictionem immediatam et universalem in omnes fideles. Christus illi dixit : *PASCE OVES, PASCE AGNOS*; quæ verba, modo absoluto prolatæ, designant officium commissum Petro, omnes oves et agnos pascendi, non solum mediate, loco aliorum pastorum, si suo officio defuerint, vel ab illorum sententia appellatum sit ad Sedem Apostolicam, sed directe atque immediate, eo modo quem utiliorem judicaverit pro opportunitate temporum. Hoc etiam probat decretum Florentinum, in quo Pontifex Romanus declaratur *doctor, et pater omnium christianorum*. Hæc verba arbitraria prorsus interpretatione intelligerentur de jurisdictione tantum mediata.

Cæterum, nihil obstat quominus plures simul in eundem gregem habeant jurisdictionem immediatam, dummodo sit subordinata; nec exinde putes detractum fore utilitati divisa rum provinciarum et diœceseon, quam divisionem ob gravissimas causas fuisse inductam omnes norunt: nec aliquam ex jurisdictionis usu confusionem pertimescas; quandoquidem S. Pontifex singularum Ecclesiarum jura ipse curat fovetque, et suam jurisdictionem non exercet immediatam, nisi id expedire prudenti arbitrio judicaverit.

Sequitur 2º S. Pontificem posse condere leges quæ tum Ecclesias particulares, tum Ecclesiam universalem obstringant, jure proprio, independenter ab acceptatione, seu fidelium, seu Episcoporum. Hoc quippe proprium est officium pastoris, ut

gregem pascat et regat; regitur autem plebs christiana per leges disciplinaires. Eo sensu concilium Florentinum agnovit in successore Petri plenam potestatem pascendi, regendi, gubernandi, universalem Ecclesiam. Traditio constans preteritorum sæculorum et ipsa necessitas Ecclesiae catholicae hanc doctrinam firmant. Traditio quidem; nam a primæva ætate permulta leges a Sancta Sede editæ sunt, quæ constituant partem maximam juris canonici. Ipsa deinde necessitas regiminis; siquidem societas christiana stare nequit sine potestate legislativa quæ provideat bono communī; porro, sola auctoritas pontifica constanter subsistit, quæ huic necessitati provideat, cum notum sit synodos generales Episcoporum non nisi rarissime coadunari.

Sequitur 3º S. Pontificem posse derogare decretis conciliorum œcumenicorum, et consuetudinibus ac privilegiis Ecclesiarum particularium, per abrogationem, suspensionem, aut dispensationem, prout necessitas postulaverit. Nemo dixerit Romanum Pontificem posse licite, absque ulla causa gravi, arbitrio voluntatis, immutare quæ sapienter statuerunt concilia, vel rationabiles firmaverunt consuetudines provinciarum; nou enim habet jura in destructionem, sed in ædificationem Ecclesiae. Unde venerabilis ille Antistes Gelasius ad Episcopos Dardanæ scribat: « Uniuscujusque synodi constitutum, quod universalis Ecclesie probabit assensus, non aliquam magis exequi sedem præ cæteris oportere quam primam, quæ et unamquamque synodus sua auctoritate confirmat, et continua moderatione custodit<sup>1</sup>. » Nullus etiam negabit quin, exigente necessitate, Sancta Sedes valeat dispensare super legibus juris communis, vel etiam eas mutare, consuetudinesque locales. « Concedimus, aiebat ipse Bossuet, in jure ecclesiastico Papam nihil non posse, cum necessitas id postulaverit. » (*Defensio cler. Gall.*, lib. XI, c. xx.) Haec cum ita sint, firmum stat nostrum corollarium. Etenim 4º non delegatione

<sup>1</sup> Labbe, *Collectio conc.*, t. IV, *Epist. xiiii S. Gelasii*, col. 1200.

conciliorum, non assensu tacito Episcoporum, sed divina ordinatione Papa constituitur ad regimen Ecclesiæ, ut necessitatibus omnium provideat, quod inducit facultatem dispensandi super legibus, et derogandi consuetudinibus locorum ; 2º si Papa utatur hac potestate, nullus præter ipsum judex legitimus erit rationis sufficientis, seu necessitatis. Causa non deferetur ad concilium quod non est adumatum, nec forte per plura sæcula convocabitur ; nec ad Episcopos in orbe catholico dispersos, qui de opportunitate rei, in tali statu, pronuntiare nequeunt ; nec ad Episcopos particulares quorum interest, siquidem repugnat sententiam superioris hierarchæ ad tribunal judicium inferiorum deferri ; hoc esset ordinis publici subversivum. Ergo manet ut Papa jure proprio possit, ob motiva necessitatis de quibus ipse judex est, derogare, etc.

Sequitur 4º S. Pontificem posse erigere diœceses, instituere Episcopos, et committere Vicariis Apostolicis Ecclesias quibus non expedit, ob circumstantias, præficere pastores ordinarios. Christus, dum episcopatum instituit, nec limites provinciarum præfixit, nec Episcopos qui Ecclesias gubernarent elegit ; hoc autem nemo præter summum Pastorem, jure proprio, efficere potest. Non certe plebs christiana, cui nullum jus competit in regimine ecclesiastico, ut in prima sectione demonstravimus ; non Episcopi viciniores, qui extra limites suarum diœceseon nullam habent jurisdictionem ; quanto minus poterunt instituere Episcopum ! Ergo haec institutio ad illum solum jure proprio pertinet, cui Christus curam universi gregis commisit ; nec alius ordo institutionis legitimus reputari debet quam ille quem ipse probaverit, sive per seipsum Episcopos eligat et instituat, sive hoc officium aliis committi sinat.

Sequitur 5º S. Pontificem habere auctoritatem judiciarum quæ in omnes causas, cum personales, tum reales extenditur ; hoc quippe officium est proprium legislatoris ; aliunde eruuntur a summa jurisdictione quam Sanctæ Sedi concessam divinitus diximus. Nou mirum proinde si, vel in prima ætate, videamus a

remotioribus partibus Ecclesiæ appellari ad judicium Romani Pontificis, ut vel ipse primus sententiam ferret, vel aliorum sententias prolatas firmaret sua auctoritate, aut revocaret.

Multa alia, his quæ summatim tantum perecurrimus, addi possent ; quidquid enim ad officium pastoris in ordine spirituali attinet, jure divino continetur in auctoritate successorum Petri.

\* 78. — IIIº Quænam corollaria sequantur ex utroque simul titulo doctoris et pastoris ?

Ex utroque officio doctoris et pastoris :

Sequitur 1º Ecclesiam Romanam esse centrum unitatis catholicæ ; nam omnes fideles tenentur illius dogmaticis definitionibus adhaerere et leges disciplinares servare ; nec privati, nec Ecclesiæ particulares, remanent in unitate, nisi quatenus servantur in hujus Ecclesiæ matris ac magistræ communione. « Ad hanc enim Ecclesiam, ait S. Irenæus, propter potentio- « rem ejus principalitatem necesse est omnem convenire Eccle- « siam, hoc est, eos qui sunt undique fideles. » (Lib. III, *Contra hæreses*.)

Sequitur 2º S. Pontificem jus habere evocandi ad suum tribunal causas majores, quæ ad fidem vel ad disciplinam spectant. Celebris est in antiquitate distinctio causarum majorum ; illas memorat S. Innocentius I in epist. ad Vietricum. Aliæ directe referuntur ad Sanctam Sedem, quin Episcopi possint de illis cognoscere ; aliæ autem terminari non debent, nec possunt, nisi per judicium hujus Sedis Apostolicæ, quamvis in prima instantia sortitæ fuerint tribunal Episcoporum.

« Si majores causæ in medium fuerint devolutæ, ait Inno- « centius in citata epistola<sup>1</sup>, ad Sedem Apostolicam, sicut sy- « nodus statuit, et beata consuetudo exigit, post episcopale « judicium referantur. »

Quæ sint in specie illæ causæ majores, non est in præsenti dicere, cum debeamus de singulis suo loco tractare ; sufficiat

<sup>1</sup> P. Constant, *Epistolæ Pontificum*, pag. 749.

proinde quasdam memorare e præcipuis. Sunt præsertim : causæ fidei — erectiones sedium episcopalium et provinciarum ecclesiasticarum circumscrip<sup>tio</sup> — institutio, translatio et deposi<sup>tio</sup> episcoporum — beatificatio et canonizatio Sanctorum — approbatio ordinum religiosorum — ordinationes sacræ liturgiæ — concessiones indulgentiarum, exceptis nonnullis quæ limites jure pontificio præfixos non excedunt.

Sequitur 3º S. Pontificem habere jus convocandi concilium generale, huic concilio præsidendi, illius decreta confirmandi.

79. — *Nota.* Sancti canones passim memorant distinctionem duplieis potestatis qua utitur S. Pontifex : unam appellant *ordinariam*, aliam *absolutam vel etiam plenitudinem potestatis*; utramque re ipsa Pontifici competere probant corollaria mox educta e principio fundamentali Primatus Apostolici. Pontifex potestate ordinaria utitur quando juris positivi dispositionem retinet ; v. g. si constitutionem edat dogmaticam, si diœcesim erigat, si approbet religiosum ordinem ; potestatem vero extraordinariam exserit quando jus humanum non servat, ut si jus ipsum auferat, si legibus conciliorum deroget, privilegia acquisita immutet... Plenitudo potestatis nullis juris publici regulis est limitata; Pontifex autem non præsumitur ea potestate uti, nisi clausuram inserat quæ id indicet, v. g., *Non obstantibus*. Nam, « licet Papa hoc facere possit, ait Fagnan, « non semper tamen decet eum uti plenitudine potestatis. » (In cap. *Super eo DE BIGAMIS*, lib. I Decret., n. 18.)

\* 80. — IVº *Quotuplicis speciei distinguantur litteræ apostolicæ quibus utitur S. Pontifex?*

S. Pontifex suam jurisdictionem exerceat, Rescriptis, Constitutionibus, litteris encyclicis, insuper et *Oraculis vivæ vocis*.

**RESCRIPTA** dicimus responsa quibus S. Pontifex jus editum confirmat, aut obscurum interpretatur, dubia proposita resolvendo; vel privatorum precibus indulget, gratias largiendo, nempe privilegia, dispensationes, beneficia, etc., aut vices committendo ad instruendas causas litium.

CONSTITUTIONES generatim nuncupantur Litteræ Apostolicæ quas S. Pontifex, motu proprio, dirigit ad Ecclesiam universalem, vel ad ecclesiam particularem, aut ad certum personarum genus in Ecclesia universalis constitutum, ad jus edendum, vel ad jus antiquum confirmandum, aut denique ad immutandum aliiquid disciplinæ.

Rescripta et Constitutiones non eodem semper modo obsignantur nec iisdem formis exarantur; unde venit distinctio Bullarum et Brevium. **BULLÆ** expediuntur per Cancellariam; obsignantur sigillo plumbeo, pendente ex chordulis sericis aut cannabensis, prout continent rescriptum gratiæ, aut rescriptum justitiæ; subscribuntur *N.*, *servus servorum Dei*, juxta usum a S. Gregorio Magno inductum; exarantur in membrana subnigra (pergamena) charactere Gallico, seu, ut aiunt, Gothicó. **BREVIA** obsignantur cera rubra sub annulo piscatoris<sup>1</sup>; contrahuntur breviori formula, in membrana candida, charactere Latino; et manu secretarii subscribuntur; expediuntur per Secretarium Brevium. Communiter forma solemnis Bullarum adhibetur in negotiis gravioribus; et forma minus solemnis Brevium melius convenire visa est causis non ita gravis momenti, quod usu consueto recipitur, nec tamen semper ita servatur; nam et majores causas identidem per Breve apostolicum expeditas fuisse constat, uti præ cæteris probat Breve Innocentii XII *Cum alias*, an. 1697, quo damnatae sunt nonnullæ propositiones e libro Fenelonii *de Placitis Sanctorum* (Maximes des Saints). Cæterum, eadem est auctoritas litterarum apostolicarum, utravis forma dentur, modo de illarum authenticitate constet<sup>2</sup>.

**ENCYCLICÆ** sunt litteræ apostolicæ ad omnes Episcopos Ecclesie.

<sup>1</sup> Annulus piscatoris refert imaginem S. Petri e navicula retia jacientis; servatur apud familiarem Papæ et, defuncto Pontifice, statim frangitur per Cardinalem Camerarium.

<sup>2</sup> Qui plura inquirere voluerit de origine Bullarum et Brevium, et de variis discriminibus inter utrumque, audeat C. Petra, *Commentaria ad constitutiones apostolicas*; *Proæmialia*, § 1, 2, 3; Ferraris, vi<sup>is</sup> *Breve*, *Bulla*.

siae catholiceæ, vel alicujus regionis, datae ad explicandam doctrinam, vel proscribendum librum damnosum, aut admonendum de abusu ut præcaveatur, aliave hujusmodi.

ORACULA VIVÆ VOCIS sunt declarationes, decisiones, seu concessiones a S. Pontifice vivā voce factae. Alia sunt authentica, et alia non. Authentica habentur quando in scripturam rediguntur et testimonio illorum quibus ex officio incumbit consignantur; si neglectu impenetrantium, aliave de causa, omis sit hæc publica in scripturam redactio, oracula carent authenticitate.

Gratiæ et privilegia oraculo vivæ vocis concessa, ejusdem sunt valoris pro foro interno, sive sint authentica, sive non, quia scriptura non requiritur ad substantiam privilegii (nº 57); unde satis frequenter contingit Papam hoc modo facultates tribuere: at si causa in forum externum ducatur, necessarium venit ut illarum concessio testimonio authentico comprobetur, ne quis prætextu oraculi vivæ vocis, ordinem communem perturbare præsumat et leges eludere.

Quinam veniant nomine officialium S. Pontificis, quorum attestatio facta de concessis gratiis sufficit, ut in foro etiam externo fidem obtineant, non omnino constat: verumtamen dici potest idoneos esse vi sui officii qui ea de re testentur: 1º Cardinales, quorum testimonio fides adhibenda est; 2º Legatos et Nuntios quibus officium specialiter fuerit commissum; 3º Secretarios Congregationum, Auditores sacri palatii, Secretarios litterarum apostolicarum et alios officiales curiæ Romanæ, quoad ea quæ « ad cuiuslibet officium, seu munus quo funguntur pertinent, » uti declaravit Urbanus VIII const. *Alias felicis*, anno 1635<sup>4</sup>.

81. — Litteris apostolicis inseri solent formulæ quibus utitur Pontifex ad removendum efficacius difficultates quæ forte exse-

<sup>4</sup> Reiffenstuel, in tit. xxxiii. lib. V Decret., § 7, n. 149-164. Ferraris, v° *Oracula vivæ vocis*.

cutionem mandati retardarent. Præcipue sunt: *Motu proprio et certa nostra scientia..... De plenitudine potestatis apostolicæ..... Non obstantibus quibusvis in synodalibus universalibusque conciliis editis et edendis constitutionibus et ordinationibus.....* His formulis Pontifex declarat se decretum tulisse *motu proprio*, id est spontanea voluntate, sive ad alicujus instantiam, sive nullo promovente, egerit. Effectus hujus clausulae est quod gratiæ concessæ motu proprio, sint sensu benigniori interpretandæ.... *Ex certa scientia*, id est re sibi nota, adhibitis virorum sapientum consiliis, ut excludatur suspicio subreptionis.... *Ex plenitudine potestatis apostolicæ*, qua potest a legibus communibus, a constantissima etiam disciplina recedere, cum judicaverit necessarium.... *Non obstantibus quibusvis*, etc.; unde nulla exceptio valet contra has constitutiones petita ex oppositis decretis conciliorum œcumenicorum; quibus cæteroquin, nemine inter catholicoſ contradicente, derogare valet, quando id expostulat majus bonum Ecclesiæ<sup>1</sup>.

82. — V° *Utrum constitutiones apostolicæ debeant in singulis provinciis promulgari ut vim obligandi habeant?*

I. Agitur de constitutionibus disciplinaribus; quoad enim constitutiones dogmaticas, omnes fatentur non esse locum dubio. Definitio dogmatica omnes Christi fideles obligat eo ipso quo certum est eam prodiisse a Sancta Sede, nec necesse est hanc definitionem per speciale promulgationem ipsis per provincias intimari.

Utrum vero promulgatio litterarum apostolicarum, in re disciplinari, fieri debeat authentice per singulas provincias, an e contra sufficiat eas in uno loco, ut puta Romæ, promulgari ut vim obligandi habeant ubi vis terrarum, et re ipsa obligent statim atque sufficienter cognita fuerit illa promulgatio, discep-tatur. Ut illa quæstio solvatur, abs re non erit memorare

<sup>1</sup> Cf. Begnudelli, *Bibliotheca juris canonici*, v° *Clausulæ communes*.— BARBOSA, de *Clausulis usu frequentioribus*; 59<sup>a</sup>, 79<sup>a</sup>, 82<sup>a</sup>; etc.

quea olim fuerit ratio a SS. Pontificibus adhibita in legum promulgatione; et quam ob causam nova deinceps promulgationis forma prævaluerit.

Per duodecim priora sæcula, Romani Pontifices constitutiones sive synodorum, sive Sedis Apostolicæ, quandoque mittebant in provincias per clericos probatissimæ fidei. Constitutiones evulgas transmittebant, inscriptas Episcopis alicujus regionis: interdum diversis Episcopis, sæpius tamen Primi, aut Metropolitanis, aut, ubi constituti fuerant, Vicariis apostolicis, qui postea Episcopis sibi subjectis nuntiabant; qui autem munus litteras apostolicas cæteris præsulibus significandi habebant, cogebant synodum regionalem, vel exemplaria, subscriptionibus munita, ad absentes mittebant per Diaconos, aliosve prudentes viros. Citantur exempla hujus modi promulgandi decreta Sanctæ Sedis quea sic ad Episcopos singulos primum, et deinceps, horum cura, ad clerum plebemque, si omnibus communia essent, perveniebant.

Versus sæculum decimum tertium, quo frequentiora fuerunt dissidia inter principes et Ecclesiam Romanam, aliam rationem sua decreta promulgandi adhibuerunt Pontifices, scilicet per affixionem in uno loco factam, cum ista clausula, quod constitutio sic promulgata *liget omnes et arctet perinde ac si ipsis intimata fuisset*. Hac usus est Martinus IV, cum in Michaelem Palæologum Graecorum imperatorem anathemate animadvertis. Similem modum servarunt plures successores Martini, v. g. Bonifacius VIII, anno 1303, in eos qui lèderent venientes ad Sedem Apostolicam vel recedentes ab ea, et deinde in Philippum Pulchrum; Joannes XXII in Ludovicum Bavaram, etc. Quo autem motivo ad id inducti sint, satis patet; et aliunde declarat his terminis Leo X in sua constitutione eodem ritu promulgata in Lutherum: « Verum quia difficile foret præsentes declaratio litteras ad præsentiam et personam Martini et aliorum declaratorum et excommunicatorum personaliter deducere, propter iis faventium potentiam, volumus ut adfixio et publi-

« catio præsentium litterarum in valvis duarum cathedralium... « ita eos liget et arctet... ac si eis et eorum cuiilibet personaliter « intimatae ac præsentatae fuissent. » Inde forsitan, exemplo ab iis casibus ducto in quibus ob temporum et hominum perversitatem, oppressionemque libertatis ecclesiastice, motivum grave suaserat recedere a veteri consuetudine notificationis et ritum alterum admittere, manavit praxis et paulatim invaluit cætera decreta eodem modo promulgandi; eo quidem magis quod satis frequenter multa, tum ex parte principum, tum etiam ex parte pluriu[m] Episcoporum, obstitissent promulgationi litterarum apostolicarum in provinciis, quas suis legibus attingere volebant Pontifices Romani.

85. — II. Tres sunt opiniones canonistarum circa vim promulgationis legum, factam sollemmodo in urbe Roma, modo nunc assueto. 1<sup>a</sup> tenet hanc rationem promulgandi litteras pontificias esse insufficientem, respectu provinciarum ab urbe Roma remotarum. Est essentiale legi, aiunt hujus opinionis patroni, ut societati intimetur non per famam, incertosve rumores, sed notitia certa; alias non est vera promulgatio: atqui, publicatio in uno loco facta apta non est ad hunc finem; non dedit, via certa et authentica, notitiam legis ad communitem, sed per populares rumores, diaria, privatas epistolæ, etc., ergo quamvis clausulae adjiciantur supradictæ, lex, hoc modo promulgata, vim non haberet obligandi. 2<sup>a</sup> opinio, quam tenent doctores non pauci, asserit promulgationem Romæ factam sufficientem quidem esse, spectato rigore juris, seu ex natura rerum, ut constitutio obligare valeat, sed de facto non obligare in foro conscientiae, nisi Pontifex suam voluntatem in contrarium expresserit. Doctores qui hanc sententiam propugnant non negant jus S. Pontificis; sed existimant eam esse voluntatem illius præsumptam ut clausulae Bullarum non aliter intelligantur quam de foro externo, pro casu quo res ad curiam Romanam devolvetur. 3<sup>a</sup> demum opinio, quea communior est doctorum, asserit leges, seu con-

stitutiones apostolicas, simul ac Romæ in curia aliisque locis consuetis promulgatae fuerint, ubique terrarum vim obligandi habere, nisi aliud in ipsis exprimatur<sup>1</sup>.

84. — III. His præmissis, dicimus 1º S. Pontificem jus certum habere statuendi ut promulgatio facta Romæ, vel in alio loco designato, sufficiat ad obtainendum vim obligandi in toto orbe christiano.

Omnis admittunt nullum in specie modum promulgationis requiri natura rerum; necessarium tamen esse atque sufficere legem eo ritu promulgari, quo possit ipsa communitas, cui lex indicitur, certam et publicæ auctoritati innixam legis notitiam accipere, nullamque ejus probabilem ignorantiam prætendere. Hinc Van-Espen concludit decreta pontificia Romæ solum promulgata non censeri promulgata respectu provinciarum exterrarum, quia, inquit, « moraliter impossibile est ut per eam publicationem populi et communitates fidelium per vastissima locorum intervalla dispersi, certam horum decretorum notitiam accipient. » Nos e contra cum communi DD. opinione, potiori jure concludimus haec eadem decreta vim obligandi habere, utpote vere ac sufficienter promulgata respectu totius communitatibus. 1º Decretum intimatur communitatibus, nomine auctoritateque legislatoris qui solemniter declarat se illud proponere urbi et orbi; 2º multiplicita sunt media quibus notitia certa hujus facti publici paulatim ab urbe principe derivetur in extremas gentes. Nonne certo in dies novimus plurima facta religiosa, politica, bellica, que in dissitis terris peraguntur? Cur item, vel potius magis, notitiam non haberemus promulgationis decreti apostolici, factæ in urbe Roma, inter quam et extraneas gentes sunt tam frequentes relationes? 3º Nemo sane dicet leges ecclesiasticas, quo die Romæ publicantur, eodem die gentibus remotissimis necessitatem inferre obtemperandi; sed

<sup>1</sup> Cf. Van-Espen, tr. *de Promulgatione legum ecclesiast.* — Reiffenstuel, DE CONSTITUTIONIBUS, n. 117-151. — Billuart, tr. *de Legibus*, dissert. iii, art. 2. — Suarez, *de Legibus*, lib. IV, cap. xv.

nihil certe repugnat asserere has leges habere in actu primo, ut aiunt, vim obligandi, constitui vere in ratione legis communis, et populos dissitos ab urbe Roma tunc reipsa obligatione obtemperandi affici, quando, elapsa tempore conveniente, pro majori vel minori distantia locorum, sufficientem certitudinem promulgationis legis habuerint. Hæc notitia, non incertis rumoribus, sed publicæ auctoritati innititur. 4º Præterea animadvertere oportet quandoque necessarium fore, ob difficultates temporum, recedere a vetusta consuetudine promulgandi leges per singulas provincias. Audivimus modo Leonem X non aliam causam allegantem in constitutione contra Lutherum. Ergo dimitti debet superiori, qui divina ordinatione providere tenuit bono regimini omnium ecclesiarum, instituere ac sancire suprema sua auctoritate ritum promulgationis quem opportuñorem judicaverit.

85. — Dicimus 2º non allegari rationes sufficientes in favorem secundæ opinionis, ut asseratur, modo generali, leges pontificias, quamvis Romæ promulgatas, de facto non obligare gentes exteriores, antequam authentice in singulis provinciis publicentur, vel usu recipientur.

Patroni hujus opinionis duobus præcipuis argumentis nuntiuntur: scilicet arguunt 1º ex jure Romano, quod saepè Pontifices declaraverunt servandum esse, ubi jus canonicum nihil constituit; porro jus Romanum requirebat promulgationem per singulas provincias, et in jure canonico nihil habetur specialiter constitutum circa modum promulgandi leges ecclesiasticas. Arguunt 2º ex incommodis: si lex sit irritans, actus contra illam, etiam ab ignorantibus facti, erunt invalidi; si lex sit tantum jubens aut vetans, inducetur confusio inter incolas ejusdem provinciæ, et dabitur locus anxietatibus; qui enim aliquid noverint de promulgatione Romana, tenebuntur lege; qui ignoraverint non tenebuntur; et si major pars ignoret, alii pauci nec commode, nec convenienter legem observare poterunt. « Ergo fundate dicimus, concludit Billuart, SS. Pon-

« tifices quorum regimen suave est et benignum, et quibus data est potestas ad aedificationem, non ad destructionem, nolle suas leges in provinciis obligare, antequam in illis promulgentur, nisi aliter se intendere declarant. »

Fatendum est non paucas utilitates secum afferre promulgationem authenticam per provincias : est quippe medium facile et securum legem cognoscendi ; viam insuper præcludit dubiis variisque interpretationibus quæ forte per longum tempus ex publicis rumoribus orirentur ; demum præcavet animorum dissidia et incertitudines, in casu quo urgent difficultates contra observantiam legis, quia libertatem relinquit pastoribus recurrendi ad legislatorem, ut illi exponant statum rerum et quid fieri debeat ab eo accipient. Contingere enim potest, ut animadvertisit Benedictus XIV, legem, quæ ceteroquin sapientissima et valde utilis est plerisque ecclesiis, non convenire tamen quibusdam provinciis... Tandem sunt forte consuetudines locales quibus non derogat lex generalis, juxta ea quæ statuit caput *Licet Romanus Pontifex* (n. 20); hæc autem nulli magis nota sunt quam Episcopis, Ordinariis locorum : quam ob causam expedire, inquiunt, ut lex, antequam obliget in foro interno, fuerit per Episcopos in suis ecclesiis promulgata authentice.

Hæc quidem gravia sunt: non sufficiunt tamen ad stabilendam secundam opinionem. 1º Quidquid sit de jure veteri, S. Sedes sufficienter statuit, per clausulas inseri solitas, quid servari nunc debeat; quod enim dicunt has clausulas referri solum ad forum externum, arbitrario asseritur, et alienum est a sensu obvio verborum. 2º Sunt rationes graves, et etiam urgentes quandoque necessitates, servandi ordinem rerum a pluribus sæculis per regulas Cancellariae constitutum. Vi harum regularum providetur efficacius uniformitati disciplinæ; si quidem facta semel promulgatione per affixionem decreti apostolici in locis determinatis, lex constituitur pro universalis Ecclesia; ac nisi specialiter ab ea Sancta Sedes nonnullas provincias

dispensaverit, cuncta negotia ad normam ejusdem legis dirimentur, undequaque orta sint. Insuper hoc modo, Sancta Sedes præcavet negligentiam, vel etiam malevolas artes quorundam pastorum, qui indefinite, variis prætextibus, protraherent promulgationem litterarum apostolicarum.

86. — Dicimus 3º rem totam pendere a voluntate summi Pontificis, cui unice standum; et hæc sit conclusio quæstionis propositæ. Quapropter, si voluerit sua decreta, simul ac fuerint Romæ promulgata, ubi vis terrarum obligare omnes qui illa certo noverint, nequaquam requiretur alia publicatio authenticæ per provincias. Hanc autem voluntatem sufficienter manifestat, quoties apponi curat in suis constitutionibus clausulas a diuturno tempore consuetas, de quibus modo dictum est.

87. — Quod ad proxim attinet, hæc observanda :

1º Episcopi debent leges pontificias, Romæ promulgatas pro universalis Ecclesia, suis diecesis intimare, nisi obtinuerint dispensationem, aut licentiam remittendi legis executionem ad tempora opportuniora. Si forte suboriatur dubium an Episcopus obtinuerit hanc licentiam, habeatve rationes canonicas differendi publicationem aut executionem legis, subdit debent regulariter stare judicio sui Prælati, in iis præsertim quæ sunt fori externi, donec S. Pontifex suam mentem declaraverit; alioquin contingent in diecisi divisiones noxiæ, aliis conantibus inducere observantias quas Episcopus impossibilis judicaret pro temporum adjunctis; quæ quidem dissensio animorum scandala procrearet, ordinemque publicum perturbaret.

2º Promulgationi solemnæ æquiparatur, imo aliquatenus vim majorem habet, ut in *Prolegomenis* animadvertisimus, ipsa legis executio, si quidem tunc moribus communitatis inducitur.

3º « Attendenda est, ait Reiffenstuel, praxis et hactenus recepta locorum consuetudo, utpote quæ tantæ est efficacæ,

« dummodo rationabilis sit, ut non solum dubium jus, quale  
 « est præsens, ob tantam doctorum et rationum varietatem,  
 « interpretari possit; sed etiam legi, tempore longævo, dero-  
 « gare. » Hæc causa fuit cur ex pontificiis constitutionibus  
 nonnullæ sint quæ variis in regionibus non obligant; quia  
 nempe nec publicatæ, nec usu receptæ fuerunt, et defectu  
 hujusce publicationis et acceptationis, quamvis ab initio cul-  
 pabili, in desuetudinem abierunt, uti notant post Reiffenstuel,  
 aliasque graves auctores, editores Cassinenses libri Ferraris,  
 v<sup>o</sup> Breve, Bulla, n. 58. (Reiffenstuel, n. 152, 153, 154.)

88. — VI<sup>o</sup> Utrum necesse sit Constitutiones S. Sedis mu-  
 niri placito regio, ut promulgentur?

Negative. Confutavimus in sectione praecedenti (n. 63), quod  
 politici dicunt de prætenso jure principis sacerdotalis, providendi  
 ne leges seu rescripta SS. Pontificum, et conciliorum ge-  
 neralium, publicentur, et executioni mandentur, nisi prius  
 fuerint a gubernio civili recognita, inscriptaque tabulis curiarum  
 supremarum. Abs re tamen non erit nonnulla subjecere  
 de quæstione tanti momenti.

1<sup>o</sup> Quidquid asseruerint juris periti in cœtu legislativo et in  
*Consilio status*, dum disserebatur de *articulis organicis*, cer-  
 tum est nulla reperiri vestigia ante sæculum XV legis civilis  
 qua vetitum sit litteras apostolicas intimare antequam præsen-  
 tatae fuerint gubernio et munitæ approbatione quam vocant  
*Exequatur seu Placitum regium*. Primum istius modi edictum  
 prodiit a Ludovico XI, anno 1475.

2<sup>o</sup> SS. Pontifices ordinationes ea de re potestatis civilis non  
 prætermiserunt, data occasione, condemnare uti alienas a  
 sacris traditionibus, injuriosas in Ecclesiam et labefactantes  
 libertatem societatis spiritualis. Sic, ut duo exempli causa  
 testimonia afferamus: Innocentius VIII commonuit litteris  
 apostolicis, datis anno 1486, Joannem Lusitaniae regem, ut  
 legem in sua ditione latam revocaret, quia hæc statuta sunt  
 aperte contra libertatem et jura Sanctæ Sedis, ac proinde

gravia et detestanda viris catholicis. Item Pius VII reclamavit  
 per suum Legatum *a latere contra articulos organicos* ob eam  
 potissimum rationem; ut videre est in ipso textu reclamatio-  
 num, quem ad calcem tomii tertii nostrarum *Prælectionum*  
 inseruimus.

3<sup>o</sup> Fundatissimum est principium Ecclesiæ catholicæ, necesse  
 esse omnem Ecclesiam convenire ad sedem Petri *propter poten-  
 tiorem ejus principalitatem*, ut supra audivimus e sancto  
 Irenæo: ita providetur unitati Ecclesiæ, et Romanus Pontifex  
 officium sibi commissum pascendi et regendi exequitur. At, si  
 apostolicæ constitutiones non ante intimari, nec effectum sor-  
 tiri possunt quam a principe sacerdotali probatae sint, admittitur  
 libertas Petri ad pascendum gregem; jurisdictione ecclesiastica  
 subditur arbitrio principum etiam hæreticorum et paganorum,  
 omnium enim eadem sunt jura politica; vis infertur Ecclesiæ  
 catholicæ.

Ergo sub quovis respectu consideretur hæc ordinatio civilis,  
 nulla ratione est admittenda<sup>1</sup>; quod non solum de definitio-  
 nibus dogmaticis intelligimus, sed de constitutionibus etiam  
 disciplinaribus; Ecclesia enim servare debet suam independen-  
 tiā in exercitio jurisdictionis, sive ad fidem, sive ad mores,  
 sive ad disciplinam referatur. Nihil quidem obstat quominus  
 S. Sedes consentiat per modum concordati, ut legum mere  
 disciplinarium executio, quæ visa fuerit obnoxia incommodes,  
 suspendatur, donec negotium cum rerum expositione defera-  
 tur ad S. Pontificem, sed necessario sibi reservat judicare, et  
 summa auctoritate definire, quid sit agendum.

Recognitio legum ecclesiasticarum a potestate laicali et  
 inscriptio in tabulis curiarum, acceptari possunt a catholicis,  
 si in hunc finem solummodo fiant ut leges canonice recen-  
 seantur inter leges imperii, quarum utique executionem ma-  
 gistratus sacerdtales urgere possint.

<sup>1</sup> Cf. Zaccaria, *Antifebronius vindicatus*, dissert. xii, cap. ii.

## APPENDIX DE PRINCIPATU CIVILI S. SEDIS.

89. — Hucusque egimus de juribus Primitui Apostolico divina constitutione connexis. Nulla quæstio hactenus mota est inter canonistas de civili principatu S. Pontificis; cum vero hodiernis temporibus nonnulli e catholicis existiment satius fore si S. Pontifex solam jurisdictionem spiritualem haberet, dum alii Ecclesiae catholicae contradictores eo usque deveniant, ut asserere non dubitent illegitimam esse et divinæ ordinationi contrariam potestatem temporalem S. Sedis, unde concludunt inanes esse, ac vi destitutas, censuras quas hæc S. Sedes edixit in usurpatores provinciarum ditionis pontificie, paucis exponemus quid ea de re sentiat Ecclesia catholica.

I. Nihil penitus obstat ex parte juris divini, et naturæ rerum, quominus S. Pontifex habeat simul jurisdictionem spiritualem in omnem Ecclesiam, et potestatem temporalem in quasdam provincias.

Hæc assertio est adeo evidens ut vix indigeat probatione; qua enim specie rationis dicetur adversari juri naturali, aut divino, rerum ordinationem quæ per tot sæcula servata est ab Ecclesia Romana, cum omnium populorum christianorum assensu?... Nulla certe est repugnantia officii Episcopi et principis in eodem homine, qui utrumque sustinere potest, ac re ipsa sustinet Romanus Pontifex, cum temperamento mansuetudinis ac paternæ sollicitudinis quæ pastorem decet, et justitiæ ac fortitudinis quæ regimini reipublicæ convenit. Nec dicant regimen ecclesiasticum, pro sua immutabilitate in doctrinis et traditionibus, adversari legitimis progressibus societatis civilis. Hæc doctrinæ catholicae immutabilitas nihil præjudicij affert societati, nec ullo modo impedit progressus, seu adoptionem eorum omnium quibus scientia et industria humana societas dotant in bonum commune. Quidquid consonum est

## ART. II. JURISDICTIO S. PONTIFICIS.

juri divino, in temporum successu ac societatum evolutione, id Ecclesia probat, admittitque, cum sobria quidem et cauta, ut decet, sed sincera et diligentí cura; si quid autem sub vana specie progressus obtendant quod cum lege divina sociari non possit, id principi laico si christianus sit, non magis probare licet, quam S. Pontifici.

II. Potestatem temporalem in nonnullas Provincias adepta est S. Sedes, non fraudibus, seu ambitione Pontificum, sed naturali rerum eventu, votis populorum, concessionibusque principum sacerdotalium, ita ordinante divina providentia in gratiam libertatis Ecclesiae.

Origines historicas, progressus, ac vicissitudines ditionis temporalis pontificiae, exponendi non est hic locus; et hæc aliunde indubius monumentis nota sunt<sup>1</sup>. Ratio etiam divinæ providentiae in adducendo hunc statum rerum, in aperto est. Cum enim catholica Ecclesia perfectæ societatis formam, vi divinæ suæ institutionis obtinuerit, ea libertate pollere debet ut in sacro suo ministerio obeundo nulli civili potestati subjaceat. Singulari idcirco divinæ providentiae consilio factum est, ut cum imperium Romanum corruerit et in plura fuit regna divisum, Romanus Pontifex civilem principatum assequeretur. Quo sane a Deo ipso consultum est ut, in tanta temporalium principum multitudine ac varietate, S. Pontifex illa frueretur libertate politica quæ tantopere necessaria est ad spiritualem suam potestatem, auctoritatem et jurisdictionem toto orbe absque impedimento exercendam. Ita plane decebat ne catholico orbi ulla oriretur occasio dubitandi, impulsu fortasse civilium potestatum, vel partium studio duci quandoque posse in universali procuratione gerenda, sedem illam quæ omnium gentium utilitatibus æquali sollicitudine et caritate consulere debet. « Nos satis scimus, ait Bossuet, Romanis

<sup>1</sup> Cf. Gosselin, *Pouvoir temporel du Pape au moyen âge*, I<sup>e</sup> partie; — DD. Dupanloup, Ep. Aurel., *La Souveraineté pontificale selon le droit catholique et le droit européen*, in-8°, an. 1860.

« Pontificibus et sacerdotali ordini, regum concessionē, ac legitima possessionē bona quæsita, jura, imperia, ita haberi ac possideri, uti quæ inter homines optimo jure habentur ac possidentur. Imo ea omnia, ut dicata Deo, sacrosancta esse debere, nec sine sacrilegio invadi, rapi, et ad sacerdicia revocari posse. Sedi vero apostolicæ Romanæ urbis aliarumque terrarum concessam ditionem, quò liberior ac tutior potestatem apostolicam toto orbe exerceat, non tantum Sedi Apostolicæ, sed etiam toti Ecclesiæ gratulamus, votisque omnibus precamur sacram principatum omnibus modis salvum et incoludem esse. » (*Defens. Declar.*, lib. I, sect. I, cap. XVI.)

Concilia provincialia in Galliis recens habita, Turonense, Burdigalense, Bituricense, etc..., omnes orbis catholici antiates, una cum S. Pontifice propugnaverunt eodem sensu jura S. Sedis, errores novatorum ea de re condemnaverunt, et S. S. D. nostro Pio IX assensi sunt, dum profitebatur se induitum virtute ex alto, quidvis discriminis, quidvis acerbatis ante perpessurum, quam apostolicum officium in tuendo hæc sacra jura ulla ex parte desereret.

III. His præmissis, « facile intelligitur quemadmodum Romanæ Ecclesiæ principatus, licet suapte natura temporalem rem sapiat, spiritualem tamen induat indolem vi sacræ, quam habet, destinationis, et arctissimi illius vinculi quo eum maximis rei christiana rationibus conjungitur. »

Verba sunt Pii IX in litteris apostolicis diei 26 martii an. 1860, quibus pena excommunicationis infligitur invasoribus et usurpatoribus provinciarum pontificiæ ditionis. Quæstiones proinde de juribus principatus civilis S. Sedis, non remanent intra solos fines ordinis politici, sed ad ordinem religiosum simul attinent, cum haec jura fuerint dicata Deo, Ecclesiæque Romanæ data in finem spiritualem, ut S. Pontifex pleniore libertate frueretur in obeundo sacram apostolatus ministerium per orbem terrarum. Qui eadem jura vi aut frau-

dibus invadunt, peccant, non solum in legem justitiæ, sed insuper in religionem, et sacrilegium perpetrant, ut mox audivimus ex *Bossuet*, quod et confirmavit S. S. D. D. Pius IX, in litteris apostolicis modo citatis, quibus facinora usurpatum provincias ditionis pontificiæ his verbis perstringit : « Grave admittitur sacrilegium, quo unà simul aliena jura contra naturalem divinamque legem usurpantur, omnis justitiæ ratio subvertitur; et cujusque civilis principatus ac totius humanæ societatis fundamenta penitus evertuntur. »

Ipsem S. Pontifex, tametsi valeat ex plenitudine potestatis apostolicæ, ob urgentissimam temporum necessitatem, alienare partem bonorum et jurium temporalium Ecclesiæ Romanae, sicuti aliquando alienavit bona et jura aliarum Ecclesiarum, id tamen non potest pro arbitrio; quia non est illorum dominus, sed dispensator, non sibi sed Ecclesiæ quæsita sunt, et in suam sedem sacramentis obstringitur ne eadem bona alienet<sup>1</sup>. Id præsertim non posset, uti haud semel declaravit, quando, ob temporum adjuncta, jurium temporatum abalienatio vergeret in detrimentum libertatis Ecclesiæ, honoris S. Sedis, ordinisque publici.

#### ARTICULUS III. — DE CONSILIARIIS ET MINISTRIS S. PONTIFICIS.

90. — S. Pontifex ministros habet qui illum consiliis et curis juvent in regimine Ecclesiæ, seu in negotiis particularibus. Sunt præsertim Em. Cardinales, Legati, Vicarii et Præ-

<sup>1</sup> Juxta Const. Pii V *Admonet*, an. 1567 editam et plures a SS. Pontificibus innovatam, is qui in Romanum Pontificem eligitur promittit ac jurat se numquam civitates, terras et loca ad S. Sedem pertinentia concessurum in feudum, vicariatum, ducatum, aut aliud quemvis titulum perpetuum, aut ad longum tempus. Cardinales juramento etiam se obligant ad servandum, quantum in se est, eamdem constitutionem, et omnes ex ipsis qui alienationes hujusmodi vetitas, R. Pontifici insinuant aut suaderent, sub etiam prætextu necessitatis vel evidenter utilitatis, eo ipso sententiam excommunicationis incurserent.